



15. februar 2019

UPA 2019/54

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqummiuppara:

**Ulloq 1. juuli 2020 aallarnerfigalugu ATV-nut qamuterallannullu akitsuutit peeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaqaq Justus Hansen, Demokraatit)

### **Tunnngavilersuut**

Kialluunniit qularutigissanngilaa Demokraatini isumaqaratta nunatsinni akileraarutit akitsuutillu qaffasippallaarujussuartut. Innuttaasut nammineq akissarsiamik sinneri amerlanerusut tigummiinnarsinnaasariaqarpaat.

UKA2018-mi ataatsimiinnermi siunnersuutini immikkoortut 197 aamma 198 isumaliutissiissusiorfigineqarput. Tassani isumaliutissiissummi Aningaasaqarnermut Akileraartarnermullu ilaasortat amerlanerusuteqartut oqaatigaat kissaatigalugu qamuterallannut ATV-nullu akitsuut peerneqassasoq. Siunnersuulli taasissutigineqanngitsoorpoq Naalakkersuisut aalajangermata siunnersuutit piiginnarniarlugit.

Demokraatini tamanna Naalakkersuisut aalajangernerat suli uggoreqaarput. Isumaqaratta qamutit taakku motoorilli eqquneqarneranni akitsuutit peerneqaraluarpata inuutissarsiortut innuttaasullu ataasiakkaat iluaquserneqarsinnaagaluartut. Ataasiakkaat kiffaanngissuseqarnerulissapput aamma innuttaasut akissakilliornerusut ataasiakkaat periarfissarissaarnerulissagaluarput qamutinik motoorilinnik taamaattunik pisinissaminnut. Peqataanik qularutigineqassanngilaaq eqqussinnermi akitsuut ATV-nut qamuterallannullu peerneqartuugaluarpat sulliviit namminersortut taakkunanga tuniniaasartut iluaquserneqartussaasut kiisalu sulliviit ulluinnarni ingerlatsinerminni taamaattunik atugallit aamma iluaquserneqartussaasut.

Akitsuutit pineqartut peerneqarnissaat ukiumut 6,5 millioner koruuninik akeqassaaq. 2020-mut Aningaasanut Inatsisissamut siunnersuutip suliarinerani taakku aningaasat nassaarineqassapput.

Neriuppunga Naalakkersuisut siunnersuutiga ilalerumaaraat taamatullu Inatsartuni partiit allat.

### **Aningaasarsiornikkut allaffissornikkullu pisortanut**

Piffissami 2014-miit 2017-mut qamuterallannik eqqussinnermi akitsuutit isertinneqartartut ukiumut amerlassuseqartartut 6.017.000 koruuninik. Piffissami tassani ATV-nik eqqussinnermi isertinneqartarsimapput ukiumut 427.500 koruunit. Taamaattumik



naatsorsuutigineqartariaqarpoq Landskarsip isertitanik ukiumut 6,5 millioner koruuninik annaasaqartarnissaa.

Allanguutissatut siunnersuutip suliarineranut atatillugu aningaasartuutit eqqarsaatigalugit, tagginneqarpoq ilinniagartuup ukiup pingajorarterutaata iluani suliarisinnaassagaa (167.000 koruunit missaani).

**Aningaasarsiornikkut allaffissornikkullu namminersorlutik inuutissarsiutunut kingunissai.**

ATV-nut qamuteralannullu akitsuutit peerpata naatsorsuutigineqartariaqarpoq taamaattunik nioqquteqarnerup qaffariarnissaa. Tamanna qamuteralaarniat ATV-nillu nioqquteqartartut iluaqtissarsivigissavaat.

**Aningaasatigut allaffissornikkullu innuttaasunut kingunissai.**

Akitsuutit peerneqarpata naatsorsuutigineqartariaqarpoq innuttaasut amerlanerusut ullumut naleqqiullugu akikinnerusunik qamuteralassinngikkunik ATV-nik pisisalersinnaassasut.